



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8 Yangia anidakangma : Tir Yimym

tiryimym@aolima

tir yimym

TAPAK 7

Sindhu 2buba round-i iogo; Sen tsükogo

Anüölen linüktem indang missile-i Russia dak kongshira mepetmesü tulu adoktsü: Putin



VOL. XXI ISSUE NO. 227 (ADOK 227) DIMAPUR YANGTEPNÜ (THURSDAY) MONUPII (MAY) 30, 2024 ₹ 5.00

World No Tobacco Day amongtsü ayongzükter Doyang nung mang 1 angu; Tsüingsang majungba ajanga timtem aika ajurur

Kohima, May 29, 2024 (TYO): State Tobacco Control Cell (STCC) Nagaland-i school ajak dang May 31 nü World No Tobacco Day amongtsü ayongzükogo.

Nagaland nung school temi iba anogomong dak sendakba sentong ka ayonga agitsüla mesüra school assembly agidang minute ishika agüja taküm omen indang sangoktsütsü mepishir ta STCC Nagaland Directorate of Health and Family Welfare-i ashi.

Taküm World No Tobacco Day omenji "Protecting Children from Tobacco Industry Interference" lir aser iba ya tobacco industry indang asameyang balala nungi tanurtem kümzüka ayutsü atema lir, ta STCC-isa ashi.

Tobacco industry-i kümshia lanurtem atsür arutsü atema advertisement nung 8 billion dollars shi endoker. Ibala maparen ya lanurtem aser moko

achir tasentem mesüzüksü atema lir ta parnokisa ashi.

Company temi smart phones aser social media ajanga lanurtem anisatsü marketing strategies balala yanglur prokshir. Parnokisa school anasa aliba dokantem dang tobacco products jungjunga sayua ayutsü ajungmesor aser item noksatem ya tanurtem indang kazüzü mesüra naglong (sweets) anasa ayur, ta STCC-isa metetdaksü.

Tobacco industry-isa menthol cigarettes aser candy-flavored e-cigarettes amala flavored tobacco products ajungketer aser iba ajanga lanurtem aser moko machirtem nem moko chibadaksür, ta parnokisa ashi.

Kaketshirtem moko nungi kümzüka ayutsü atema school temi shilem agitsübaji kanga tongtipang lir. Iba sentong nung shilem agiba ajanga asenoki asen tanurtem moko nungi kümzüka yutettsü ta SNCC Nagaland-isa ashi.

Delhi nung 52.3 degrees tatsük liasü

New Delhi, May 29, 2024 (Agencies): Delhi-NCR nung Bodbarnü temperature 52.3 degrees Celsius tatsük liasü aser iba ya India nung highest-ever temperature lir.

Alima nung tatsüktiba temperature record süteta alibaji July 10, 1913 nü 56.7 degrees Celsius lir aser tanü Delhi nung 4.4 degrees agi dang matong tatsük liasü. Alima nung tatsüktiba temperature ji California kübok Death Valley nung Greenland Ranch nung

record süa liasü.

India Meteorological Department-i ashiba agi Delhi kübok Mungeshpur weather station nung tanü nikongdang 2:30 ako meta temperature tatsüktiba record asü.

India nung tatsüktiba temperature ji 2016 küm Rajasthan kübok Phalodi nung 51 degrees Celsius record asüba liasü. Iba sülen 2019 küm Churu nung 50.8 degrees aser 1956 küm Alwar nung 50.6 degrees liasü.

GPRN/ NSCN (Unification)-i jangjashitsür



Dimapur, May 28, 2024 (TYO): Ato Kilonser N Kitovi mapa nungi anentsüba ya temzüngi memelar aser iba ya nisung kar pei ajangzüksü atema inyakba mapa ka lir aser onoki magizükter ta GPRN/ NSCN (Unification)-i metetdaksüogo.

April 21, 2024 nü Ato Kilonser N Kitovi mapa nungi anentsütsü bangzüng renembaji May 28, 2024 nü annual national assembly nung magitsü lemtego.

GPRN/NSCN-i April 21, 2024 bangzüng magizükter aser ibaji mali akümer. October 31,

2022 nü Kitovi küm trok (October 31, 2028) tashi inyaktsü ajaki mulunga shimtet ta parnoki metetdaksüogo.

Assembly session nung President Maj. (Retd) R M Lotha, Vice president Chennyem Konyak, Ato Kilonser N Kitovi aser Deputy Ato Kilonser Jungshiwati Ao nunger collective leadership lenisüba pusemstü lemtego.

"Lanu pututem azükarutsü atema yimtenren mapa tasen ka bener arutsü mapang tongogo. Yimjung melira terenlok malitsü" ta N Kitovi-ia ashi.



Dimapur, May 29, 2024 (TYO): National Disaster Response Force, State Disaster Response Force, Wokha aser NSDMA under-water Drone team külemi meranga inyakba ajanga Doyang dam nung tasümang ka ngutetogo.

Iba mapa nung under water drone ka amshi aser iba ajanga NDRF aser SDRF tzüwartemi tzü telung nung tasümang ngua agitetogo.

Bodbar nikongdang 1:10 ako meta Elanthung Ngullie (20) indang mang angu ta NSDMA, Home Department-i sangdong ka nung ashi.

Tzünglu kanga aruba ajanga Kohima district nung teraksa kar bentsür aruogo aser iba atema Commissioner of Police, Dimapur-i travel advisory ka

metetdaksüogo.

Tanga tetuyuba ka magütsü tashi Dimapur aser Piphema - Kohima tsüngda aonung mesenzütsü metetdaksür. Tsüingsang majungba ajanga lendongtsüdong nungi jenbua alitsü atema iba tetuyuba agütsür ta Commissioner of Police-i ashi.

Wokha district kübok Sanis Subdivision nung anentsüh aluba gari lenmang shibanga liasü saka May 29, 2024 nü Road Maintenance Party-i lenmang lapokogo.

Baghty tsütsü aoba lenmang nung anentsüh aluba yashi okdoka liasü saka yasüng ano anentsüh tasen aluba ajanga lenmang noktang.

May 28, 2024 nü tzünglu kanga aruba ajanga Zunheboto district kübok Tseminyu aser

Ghathashi nung High Tension (HT) aser Low Tension (LT) power lines raksatsüogo.

Iba ajanga Kohima district nung 33Kv ITI, 33Kv Ringmain-2, 33Kv Chakhabama, 33Kv Lalmati, 11Kv Ministers' Hill, 11Kv Paramedical, 11Kv Jakhama Civil, 11Kv Jakhama Army, 11Kv Science College Jotsoma, 11Kv Zubza, 11Kv TV Centre Jotsoma, 11Kv Khuzama, 11Kv Kigwema, 11Kv Sendenyu, 11Kv Thizama aser tanga LT Feeders nung kongshiogo.

Kohima Electrical Division kübok public aser consumers dang iba osang metetdaksür aser HT o LT lines kar yangluogo ta Executive Engineer, Electrical Division, Kohima, Er. Shiludi Longkumer-i ashi.

SAYO-i NH-29 Kohima-Mao road atema tebilemstü lemsateper

Kohima, May 29, 2024 (TYO): Southern Angami Youth Organization (SAYO)-i NH-29/ NH -2 Kohima-Mao lenmang yangluba nung temulung masüba metetdaksüogo.

SAYO-i aiben mepishiaka NHIDCL (National Highways and Infrastructure Development Corporation Limited) aser tanga ketdangsurtemi iba lenmang asoshi temulung magütsür ta president Metekhrielie Mejura aser general secretary Meteviso Sophie nati ashi.

NHIDCL-i DPR (Detailed Project Report) inyakyim mebenshir aser planning mesüra supervision melii dang mashii inyaker ta SAYO-i ashi.

NH-29/NH-2 ya Southern Angami tesentem atema dang masü saka Manipur aser South East Asian linüktem asoshi tongtipang lir ajisüaka senzüka yutsür. Viswema-Jakhama NH-2 tsüngda apu kanga mejungi lir aser chireptsü ana nung dang lir. Anungji NHIDCL aser ketdangsurtemi iba apu tekaratiba nung yanglutsü

akhanger, ta SAYO-isa metetdaksü.

Iba apu meyanglushira National Highway nung gari mesenzüdaksütsü aser iba tebilemstü khuretji NHIDCL, bangdak ketdangsurtem aser contractor temi abentsü. Anungji anogo 15 tsüngda apu yanglushitsü mapang züngzüksür ta SAYO-isa ashi.

SAYO-isa Nagaland Governor aser Chief Minister dang NHIDCL aser contractor nem nungdakba tetuyubatem agütsütsü mepishiogo.

CUET 2024-25 nung Meghalaya aser Nagaland medendaksür

Guwahati, May 29, 2024 (Agencies): Union Education Ministry-i 2024-25 academic session atema Meghalaya aser Nagaland state tem Common University Entrance Test (CUET) nung medendaksütsü metetdaksüogo.

"Ministry ajanga lemtetba UGC-i agizüogo aser Meghalaya (NEHU) o Nagaland (Nagaland University) state tem nung

Central Universities nung affiliated colleges nung admissions agidaksütsü. Academic year 2024-25 atema dang CUET nung medendaksütsü" ta union education ministry nung under-secretary Gopal Kumar-i ashi.

Meghalaya chief minister Conrad Sangma-i Centre sorkar dang CEUT 2024-25 nung Meghalaya medendaksüba atema

pelaba metetdaksüogo.

"Meghalaya nung central universities nung tan academic year atema affiliated colleges nung asen admissions asütsüpurtem CUET nung medendaksür" ta CM Conrad-i ashi.

May 15 nü Meghalaya aser Assam nung Central University Entrance Test (CUET) tenzüka sülen tetsükdaksü ajurua liasü.

State College of Teacher Education Kohima nung Cultural Day amung



State College of Teacher Education Kohima nung May 29, 2024 nü Cultural Day amung dang tangokba noksa ka nung Minister, Higher Education & Tourism, Temjen Imna Along aser ketdangsürtem angur.

Dimapur, Monupii/May 29 (TYO): State College of Teacher Education Kohima nung May 29, 2024 nü Cultural Day munga liasü. Iba anogomung ya "Weaving a Tapestry of Humanity" omen nung ajemdaker amung, aser iba sentong nung tesemdanger tongti ka ama Minister, Higher Education & Tourism, Temjen Imna Along dena liasü.

Iba sentong nung jembidang, nisung takum ya tajangshiba balala, mangdang aser tejangraba külemi taktepa lir, ta Minister Temjen Imna Along-i ashi.

Nisung shia mangdang balala lir aser ibaji ajanga alima

nung alirtem ajak balala lir aser itemji jangiateta tepela aser tayongzükbatem agizüksüla aser asen sobaliba aser yimsüyimbong ajanga asenok lungjemdaktsüba yimyaliru lemsatepsüla, ta pai ashi.

Pai tesayurtem dang nenok iba reju nungi takok ngua zünger ayazüka aodang tesem aser kakat reju balala nung inyaksü, anungji Naga nung tarutsü putu yanglushitsütsü nenoki tongtipang shilem agitettsü, ta ashi.

Naga nung er aikati tesayur mapa ya maongka tatembang amai bilemer, ajisüaka ibai maongka tulutiba lir, kechiaser sayutsü aser nisung ka

lenmang shidak nung anitettsü ya temoatsü tulutiba lir, ta Minister Temjen Imna Along-i ashi.

Asenok ajaki khen-khen bo tamakok ajurur, saka asenok teti dang tsüboa malitsüla, kechiaser nisung ajak tapensa masü. Asenoki tajung asoshi ajemalur meranga inyaksüla aser ochishia alitsü merangtsüla, ta pai ashi.

Iba sentong nung menden Assistant professor Ketoriavi Sakhrie liasü, Principal Dr. Elizabeth Walling ajanga tarur pela agizükba o jembi aser Dino Girls Hostel ajanga sobaliba temeyoktep shilem ka agia liasü.

Longleng nung NStCB indang branch tasen ka lapokogo

Dimapur, Monupii/May 29 (TYO): Nagaland State Cooperative Bank Ltd ajanga branch 23 buba Longleng jila kübok Shamakok complex, PPC Ward nung May 29, 2024 nü Deputy Commissioner, Longleng, Dharam Raj, IAS ajanga semzükja liasü.

Deputy Commissioner Dharam Raj-i iba sentong nung jembidang Nagaland State Cooperative Bank ya nüburtem indang bank ka lir, kechiaser iba bank indang nükjidong tongtipangtiba ya nüburtem senotsü agi yaritsü asoshi lir aser ibai tajangzük atema masü, ta ashi.

Senotsü alinung dang terenlok alir, ta pai ashi.

Bank-i guidelines ajunga sülen anidaktsüla saka danga bank ama mesüi atsüanem

akatsüla, ta Deputy Commissioner ajanga ashi.

Nagaland State Cooperative Bank ajanga service tem tajungba agütsütsü aser interest tajungba nung loan agütsütsü, anungji nüburtemi iba maongka tajungtiba nung amshitsüla, ta pai ashi.

Iba sentong tenzuka jembidang General Manager Nagaland State Cooperative Bank, Jonah Sema-i Bank ajanga agütsüba scheme aser sentong balala indang rasaa ashi.

Longleng jila tiyong nung aliba Nagaland State Cooperative Bank indang branch 23 buba ya ki nokdakba kisung masü saka Longleng jila nung alirtem atema senotsü tsütsü tashi angutsü aser terenlok atema teimla lir, ta pai ashi.

Iba mangdang asangsang

akumtsü asoshi anibelen mesasai inyaker ajak dang pai pelaba lemsatepa liasü.

Iba sentong nung NStCB indang vice chairman H. Kashito Yepthomi, Phom People's Council tir Y.B. Angam Phom, Village Council Chairman & Village Development Board Association District Longleng tir C.Ngampu Pho maser Director, Hope Channel (NGO), Tiakala Amri nungeria o jembia liasü.

Iba sentong nung Assistant General Manager, NStCB, Mhathung Khuvung menden liasü aser ARCS Longleng, Atongba-i melepzüng o jembi.

Iba bank meshiteta Executive Secretary, Phom Baptist Christian Association, N. Tialemba Phom ajanga sarasademja liasü.

Dr. Kekhrielhoulie-i Mon nung school kar semdang

Dimapur, Monupii/May 29 (TYO): Advisor, School Education & SCERT Nagaland, Dr. Kekhrielhoulie Yhome-i May 28, 2024 nü Government High School Mon Town 'C' aser May 29, 2024 nü Government Higher Secondary School Mon semdanga liasü.

Iba mapang pa meina Commissioner & Secretary, School Education, SCERT, Kevileno Angami; Mission Director, Temsunaro aser Engineering Cell nungi EE, Er. Hokato Sema nungertem oa liasü.

Iba mapang parnoki school ki semdanga ki o jen asadanga liasü.

Advisor Yhome-i school ketdangsürtem dang ajak nung

sorkar dak kisung metaloka malitsü ayongzük, kechiaser tesayur aser staff aika yangji aliba nüburtem dang lir asünung parnok dang school tajungba akumtsü khuret abentsü ajungshi.

Pai school principal aser staff tem dang school mürekmejuba nung kaketshirtem nem shilem agidaktsütsü ayongzük liasü.

Danga district nung aliba school ki dang nungi Mon nung aliba school ki tem ya tajungba lir, ta Advisor, School Education & SCERT ajanga ashi.

Pai küm 5-10 tsüngta school 40 nungi 50 tsüngta upgrade asütsü aser tesayurtem agi anungba indang tebilemstü süoki ia reprangtsü ta ashi.

Mokokchung nung FSSAI mapa inyak

Dimapur, Monupii/May 29 (TYO): Food Safety Mokokchung Zone ajanga FSSAI nung sendaka aliba MS Certification Services Pvt. Ltd., Kolkata ajanga Mokokchung, Tuensang aser Zunheboto district tem nung chiyongtsü ayokdak tesem aser chiyongtsü yangluba tesem amala nung hygiene rating & high risk audit amala Food Safety & Standards Authority of India (FSSAI) maparen balala den Eat Right School, Eat Right Campus, Eat Right Place of worship & Eat Right Vegetable market amala ayongzük liasü.

Item maparen ya May 21 nü nungi tenzuka May 29, 2024

tashi inyaka liasü aser iba ya ajanga nüburtemi chiyongtsü achitsü atema pei sasa tesem shimer aser chiyongtsü business inyaker danga chiyongtsü mürekmeja tajung agütsütsü ajungmesor.

Hygiene rating certificate ya küm ana atema dang lir aser küm ana nung khen establishments indang re-audit agitsü, ta C. Merenlemba Ao, Designated Officer (Food Safety) Mokokchung Zone ajanga ashi.

Pai Food Business Operators (FBOs) tem dang maneni FSSAI standards amshitsü aser Food Business establishments tajung ayak yanglutettsü ajungshia liasü.

Tuensang nung Nagaland Lokayukta indang awareness agütsü

Dimapur, Monupii/May 29 (TYO): Nagaland Lokayukta inyakyim indang awareness sentong ka District Administration Tuensang den lungjemer May 29, 2024 nü Deputy Commissioner, Tuensang indang Conference Hall nung agia liasü.

Iba sentong nung jembidang Banuo Z Jamir, Lokayukta Nagaland ajanga ashiba agi, Lokayukta ya 'independent body' ka lir aser sorkar indang office inyakyim nung aser nübur tenzük temi ochimashi mapa inyakba, tim masüba nung tashi amshiba aser meshidaki ketdang asüba bushisüngdangtsü tashi lir.

State nung nübur ketdangtsüba mapa nung parnoki ochishia inyaksü atema parnoki tongtipang shilem agir, ta lai ashi.

Deputy Commissioner, Tuensang, A. Zibenthung Kithan-i iba sentong nung o tatsüka jembidang Banou Z Jamir-i anir Nagaland Lokayukta ajanga anibelem mesasai district nung Lokayukta indang awareness agütsüba atema pelaba lemsatepa liasü.

Iba sentong nung Mayang Lima, Upa Lokayukta ajanga Nagaland Lokayukta Act 2017 aser PC Act 1988 indang jembi aser Khanrinla T Koza, Upa Lokayukta ajanga Whistle Blowers Protection Act 2024 indang jembia liasü.

Iba sentong nung Banuo Z Jamir, Lokayukta, Nagaland menden liasü aser P. Mono Khamniungan Secretary, Nagaland Lokayukta ajanga melepzüng o jembia liasü.



(Abelen) Mopung tesashi dener tzunglu tanen makai aruba ajanga Peren district nung Tening Sub-Division kübok Old Ngaulong yimtsung nung ki o jen aser school ki jenti raksatsüogo. (Tiyong) Kiphire district nung Pungro Sub-Division kübok Zaonger billage nung mopung kanga sashia aonba ajanga kilem shizüka bener orr aliba noksa nung angur. (Achichi) Wokha district kübok Sanis Sub-Division nung anentsüh tuluka alua lenmang nokdanga aliba May 29, 2024 nü Road Maintenance Party ajanga mürektet.



Bengaluru, May 29, 2024: India Post Payment Bank (IPPB) kübok bank account shia nung sen 8000/- inoktsür ta tiyazü olulu prokba sülen Bodhbarnü Bengaluru nung tetsürtem saving account lapoktsü atema adenshia aliba noksa nung angur.

CAA kübok WB aser Haryana nung senso agütsü tenzükogo: MHA

New Delhi, Monupii/May 29 (Agencies): Ministry of Home Affairs (MHA)-i sangdong ka ajanga, Union sorkari Citizenship Amendment Act (CAA) kübok West Bengal, Haryana aser Uttarakhand state tem nung senso agütsü tenzükogo, ta metetdaksü.

Home Ministry-isa, pepei state sasep nung State Empowered Committee temi linük senso atema temepishibatem agizükogo, ta metetdaksü.

"Citizenship (Amendment) Rules, 2024 kübok West Bengal nung senso certificates agütsü tenzükogo. Iba state nung tanü mezüing Empowered

Committee, West Bengal-i application aika agizük," ta Union Ministry sangdong ka ajanga metetdaksü.

"Haryana aser Uttarakhand nunga Empowered Committee temi tanü mezüing pei pei state nung applications agizüka senso certificates agütsüogo," ta MHA-isa metetdaksü.

Taküm May ita tomlen New Delhi nung mezüing Union Home Secretary Ajay Kumar Bhalla-i nisung 14 nem linük senso certificates agüja liasü.

Union sorkari West Bengal nung CAA kübok linük senso agütsüyonga West Bengal Chief Minister aser TMC tongti lenir, Mamata Banerjee-ibo, lai lar

state nungbo CAA aser NRC na memelatsü, ta jembia liasü.

West Bengal CM-isa Uniform Civil Code (UCC) anema ola adoker.

Bangladesh, Pakistan aser Afghanistan linüktem nung reshikangshi ajuruba ajanga 2014 küm December 31 anogo tashi nung India-i arua jenoka alir Hindu, Sikh, Jain, Buddhist, Parsi aser Khristantem nem linük senso agütsütsü atema 2019 küm December ita nung Parliament House anaprongla nung Citizenship Amendment Act (CAA) agizüka liasü; iba sülen küm pezü shir lir taküm March 11 nung ang iba ya ozüing küma benoktsü sangdong.

Supreme Court-i Kejriwal temepishiba magizük

New Delhi, May 29 (Agencies): Delhi chief minister Arvind Kejriwal-i interim bail ano anogo tenet meshisema temepishiba agütsü, ajisüaka Bodhbarnü Supreme Court-i magizük, anungji June 2 nü pa Tihar Jail-i tanaben aitsüsa akümtsü.

SC registry-i iba temepishibaji magizük. May 10 nü Justices- Sanjiv Khanna aser Dipankar Datta nati Kejriwal nem interim bail agüja liasü saka June 2 nü Tihar jail ktdangsertem matsüingdangi

meypa arutsüla, ta tuyu.

Delhi Chief Minister Arvind Kejriwal-i pa temang mejungi aliba nung ajemdaker pa nem ano interim bail anogo 7 süklökjang ta mepishiba ken oji Mongolbarnü angadangtsü Supreme Court-i memelungi liasü.

Vacation bench nung Justices- JK Maheshwari aser KV Viswanathan nati, Kejriwal indang temepishiba list ji Chief Justice of India-i yanglutsü, ta metetdakja liasü.

Kejriwal atema ken o

jembitsür, senior advocate Abhishek Manu Singhvi-i, temepishibaji medical kuli nung ajemdaker agütsüba lir, ta metetdakja liasü.

Kejriwal-i pa temang nung blood glucose aser ketone levels teimba akümer, anungji PET-CT Scan densema medical tetendangba balala agütsüsa akümer, ta shia bail meshisem.

Delhi excise policy ken o dak sendakba nung taküm March 21 nü Enforcement Directorate (ED)-i AAP tongti lenir, Kejriwal pua liasü.



Rajkot, May 29, 2024: Tawa Gujarat kübok Rajkot nung aliba Rajkot game zone nung mi lendong ataloka nisung aika asüba sülen iba lendong nung asür Khyati Savaliya aser Harita Savaliya na asüpila sentong nung tangokba noksa nung angur.

Delhi nung tang mezüing temperature 52.3 °C tashi atu

New Delhi, May 29 (Agencies): Bodhbar nü Delhi nung temperature of 52.3 degrees Celsius tashi atu, aser ibaji Delhi puti otsü nung tang teimtiba atuba lir.

Delhi kübok Mungeshpur nung temperature 52.3 degrees Celsius tashi atubaji linük yimtiba nung tang teimtiba atuba lir.

IMD-i Delhi atema red alert sangdonger aliba mapang aser yimti nung power load teimtiba nungdakba mapang nung ya atalokogo.

Delhi nung peak power demand ji 8302 MW liasü aser ibaji Delhi puti otsü nung tang teimtiba lir, ta DISCOM ktdangsertemi metetdaksü.

Indian Meteorological Department (IMD)-i Punjab, Haryana, Chandigarh, Delhi, Uttar Pradesh aser Rajasthan tesem aika nung kanga tatsük asütsü, ta metetdakja liasü.

Delhi nung Aam Aadmi Party (AAP) sorkari Delhi Jal Board CEO dang tzü lalushibong masütsü tuyuba den külemi yimti tesem ajaken tzü amajok nung indokba nokdangtsü atema team 200 tentetang, ta tuyuogo.

AAP-i, "Gari shidokba, tzü tank nung tzü sünger moshidaktsüba aser commercial mesüra kisüjensüba maparen atema kidang amshitsü mesüoka aliba tzüj amshira itemji tzü amajok nung indokba ama züingshitsü. Tzü amajok nung indokertem dang senchi 2,000 achitsü atema tetuyuba agütsüogo," ta metetdaksü.

Ano külen Delhi Lieutenant Governor, VK Saxena-ia nüburttem dang aayangertem ghonda asem- anüingdang 12:00 ako nungi nikongdang 3:00 ako tashibo anisüingzüktsü atema temelaba agütsütsüla, ta tuyuogo.



May 29, 2024 nü Mandi nung BJP candidate aser actress, Kangana Ranaut-i Lok Sabha election atema nüboyimdang tangokba noksa nung angur.

Rahul aser Akhilesh nati EVMs nem tai tongloktsütsü: Amit Shah

Maharajanj, May 29 (Agencies): Bodhbarnü Union home minister, Amit Shah-i Samajwadi Party aser Congress na aija, Lok Sabha election nung tamakok ngura parnoki electronic voting machines (EVMs) nem tai tongloktsütsü atema teletmetba agiogo, ta metetdaksü.

Uttar Pradesh Lok Sabha elections nung Congress aser Samajwadi na longjemer tokteper. Party anaprongla ya opposition INDIA teloktep nung densema aliba party lir.

Maharajanj nung BJP candidate, Pankaj Chaudhary atema nüboyimtsüba sentong nung jembidang Amit Shah-i, Lok Sabha election shilem pongububa agi tashi nung BJP-i majority menden tongtetogo, ta metetdaksü.

"June 4 nü vote azüingtsü. Iba anogo nikongdang chuba chir anati (Rahul Gandhi aser Akhilesh Yadav) osangbenertem senden ka ayongzüka jembitsü, aser 'EVMs nung timtem aliba ajanga onoki tamakok angu' ta tenati ashitsü," ta Shah-i aitsü.

"Modi-i election shilem pongububa tashi nung menden 310 dak tema nguogo. Rahul

baba, nai menden 40-a mangutsü aser tanga tamarener chiri (Akhilesh Yadav) menden pezü dang angutsü," ta Home Minister-isa ashi.

Shah-i, opposition teloktep nungi Ato kilonser candidate mali, aser parnoki takok angu nunga küm pongu nung parnok Ato kilonser pongu alitsü, ta ashi.

"Iba ya general store ka masü saka nütsüing crore 130 aliba linük lir. Iba ama Ato kilonser jagi mapa inyaktettsü no?" ta pai asüingdang.

Congress lenirtemi Pakistan ket nung atom bomb lir ta jembir, ajisüaka BJP-i atom bombs metsübur, ta pai ashi.

"Pakistan occupied Kashmir (PoK) ya India shilem asütsü aser onoki ibaji tanaben meyipa agütsü," ta paisa metetdaksü.

Tamalen Uttar Pradesh nung sorkartemi sugar mills shibangtsüba atema aija Shah-i, BJP-i maneni sorkar kümra party-i Maharajanj nung sugar mill tulu amenoktsütsü, ta nangzük.

Lok Sabha election shilem tatembangbuba anogo- June 1 nü Maharajanj nunga election agütsü.



TIR YIMYIM YIMOBILEM (EDITORIAL)

DIMAPUR YANGTEPNÜ, MAY (MONUPII) 30, 2024

Nisung tamajunger jenokdak !

Naga nunger yimten nüchiso bushir telok zünger mezüంగా aika küma aoba mapang ka nung NSCN (Unification) lenir Kitovi Zhimomi-i Naga yimten nüchiso bushiba telok nung adenertem rongnung nisung aika lokti nungi jendokba aser ozüంగా raksaba aibelen mapatem ajanga tema nung melitet tejenokdak bushia jenokba rogotem lir ta ashiba oji tanganütsübo maket saka masüa ta meshitetsüba o ka lir. Aji oda, Naga yimten nüchiso bushiba maparen nung timtem, mangatettep aser telemasa adokpet adokba tebilemtsü ya Naga yimten nüchiso bushir masü saka Naga yimten nüchiso bushiba telokjiang pei taküm asoshi tejenokdak kümer aliba ajanga ataloker ta angatetter. Alima nung senso ka atema mapa tongtibangtiba aser tasaktibaji pei tetsü taso lima yimten nüchiso jenjang ka alangtetsüba mapa ya lir. Iba nüchiso jenjang atemabo aikati taküm tenla agütsür, anungji pei tetsü taso lima meimba shisatsü aser tenela ka medeniang linük tenzükba mapa nung senso kati pei lima yimten nüchiso asoshi menokdaktetsü. Ibai pei tetsü taso li meimer tasütait nokinketertertem mapa lir. Item nokinketertertem jagibo pei nübortemi parnok tsübuttsüsa malir, kechiyong parnokji nübortem asoshi nüchiso jenjang bushitsürtem lir. Item jagibo pei taküma mapayur aser pei agitsü rongsen bushitsüa tebilema mebilemer. Aji oda, alima yimten nüchiso bushiba o alima rongsen bushiba mapa na külemi aotsü tasak. Iba jagi asen akhi tsüraburtem otsü nunga nokinketertertemi sü achiba otsü mangashitsü aser sü achirtemi arür alepba aser mangkoterongi atuba otsü mangashitsü. Ajisüaka, tanübo nokinketertertemiang süa achir aser sü achirtemiang nokinketertertem konang naroküma agiteter ta shibabo nübortem asoshi inyaker aser shibabo pei asoshi dang inyakar kecha mebentet ka kümogo. Atangji, tanü Naga yimten nüchiso bushirtem telok nung adenertem rongnung shibabo pei akaba aser pei jenjang tajung ajak toktsür pei tetsü taso lima asoshi yimten nüchiso bushiba tongpang nung nokdaksü apuso (?) aser shibabo pei taküm kümzüksü asoshi Naga yimten nüchiso bushiba telok nung jenok (?) ta bushidangra, ashiko, shitakba Naga yimten nüchiso asoshi tangatetba aser temulungtetba nung linük tenzükba mapa nung nokdakertem dang nungibo tejenokertemjiang teimba asütsüa akok. Naga nunger lokti ya tilaka dang aser Naga nunger nütsüంగా ishika dang, anungji ajak metettepa aliba purtem dang lir. Aji oda, tang Naga yimten nüchiso bushir teloktem nung dena alir linük tenzükertem taküm kulitemji bushia odangra, kar dak alaka, linük tenzükertem aika Naga yimten temeten angatetba nung masü saka pei taküm kümzüksü aser pei kibong mesütsü bilema ayangertemang asütsüa akok. Item jagi Naga nungertembo anogo 40 agi küm noklang dak tali jajatsüsa timtemdaksüdag. Tulu tila ta masü mesüra tema mesüra telong nung alirtem ta masü, shirnoki pei lima aser nübortem dang nungibo pei taküm aser kibongang temeimba meimer aser tapayuba apayur, parnokjibo yimten aser linük tenzükba mapa nung timtema melii adokadoktsüla. Kasaji, shirnoxa lokti nungi jendokba aser ozüంగా rasaksaba mapatem agi tema nung sadema melitetsüsa akümba ajanga Naga nunger yimten nüchiso bushiba teloktem nung züంగా sema ali, parnokjia yimten nüchiso bushiba tongpang nungji menokdaksüla, kechiyong parnokji metemsü, anungji parnokji tongpang nung nokdaka ali tashi, ashiko, Tsüంగాremi Naga nunger meimaka mapa meinyaksü. Joko, Naga nunger yimten nüchiso bushiba mapa nung kanga belemogo aser kanga akoksaogo aser shisabolu manener, anungji Naga nunger lanu putu danga meima linük tenzükba mapa nung alirtemi pei taküm aser pei mapa Tsüంగాremi agizükttetsüsa alitsüla, kechiyong Naga yimten nüchiso atema raraba yabo "Nagaland Khrista asoshi" ta yimyim ayima rarar. Ibai tetsübuttsüka !

OLEMSABANG

Nai sapuba Party süaka takok tulu asoshi sarasadem masü tajungba

~ S. T. Yapang Lkr, Kohima.

Centre nung Political party tashi ita aliba telok rongnung asen Naga nungeri tenzükba Party mali. Centre nung yimsüsüba party ajak nung tamajung lir, tajunga lir. Asenoki ang metenzüker ashi Pastortem senteper Naga Pastor Party ta mesüra Rev. nguteta alirtemi parnok asoshia political party ka tenzüksüji temzüంగా mela alitsü aser parnokia election-i aitsüji temsüa lir mesüra pa/lai "iba party-ji support süang" mesüra "vote iba party nemjibo teinoktsü" ta ashitsü/nübuyimtsüji temeten lir, saka asenok voter-temi metettsübaji pa/la/parnokji Tsüంగాrem party masü mesüra Tsüంగాrem tesayuba masü, pa/la pei tejangraba nung nübuyimer dang aser pa/la election-i ai nunga aji Tsüంగాrem election-i air masü pa/la neja dang ta asenoki jangja metetdi.

Nai Congress junger asür aser centre nung Congress mesüra par teloktep I.N.D.I.A arudaktsünüaka tang MP election nung ya Congress menden 200 dang timba tadokdaksü ta sarasademtsü tim, kechiyong Congress kijai sorkar kümtetra asenok tamangba yimsü den meputepba ozüంగా tasen LGBTQIA+ ya inoksemra koda? Ajibo yutsür alemli par mapang nübur taochi makai tepseta intoktsü Sepai nem tashi agütsüba AFSPA koba ajanga asen Naga nunger aika tepseta reshikangshia yimtem rungtoktsü, tang centre nung BJP-i aniba NDA yimsüsüba mapang Nagalima tesem aika nungi AFSPA agiina lir, ibai ano meyipa benoktsü shingaia meteta maka, yamajisüra na anasa cartsüంగా ka pokra (tyre burst) teburtem tenaret süktanga zükerang tetsürtem kechi tiai ajar asenoki memetet. Idangji "Ni congress nem vote ajentsüa sarasademtsüogo" ta ashiba agi na mekümsüktetsü. Ano Nagaland nung BJP metoktepaka centre nung BJP kija nema yamaji menden 200 dang timba mangutsüsa na BJP pukümer ka asüyonga sarasademtsü tim, kechiyong BJP-i UCC ya benoka ora timtem lir.

Asen mulung masüakako, takoktsüa sür party ka kijai 272 atena mengudaktsünüba dang masü 200 atena metudaktsünür. Yamaji asünung ang nübur ola angalema inyaksü, sarasademba yabo putir aikati sarademba melangzüdang kecha meimlaba nisung kati sarasademba ang langzüksü akok, anungji na congress/BJP tepu akümer ka süaka ner party kijai sorkar kümtettsüsa Tsüంగాrem dang sarasadem masü tajungba. Ajisüaka tang Nagaland nungbo NDPP o Congress na tesashiba tokteptsüsa angur, NDPP ya adokra pa kija asünungji kobateloki centre nung sorkar yangludir yangji tenküm, ano Congress adokra Congress kijai sorkar mekümteti I.N.D.I.A teloktepi sorkar kümra paa yangji tenküm.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Israel nung archaeologist temi Tenla ki tejen ka tutet



May 29, 2024: Israel nung archaeologist temi kum 1,500 tejaklen aliba Tenla ki ka tutet aser jara nungji temeshi aini aoer Khristantemi yangluba noksatem lir.

Akhidang Khristantemi Yirusalem aser Bethlehem nung tesem balala semdangba mapang nung Khristantem iba tesem nungji anenzüka liasü, ta bilemer.

Israel Antiquities Authority (IAA) nungi archaeologist temi Israel kübok Negev nung ali tua bushisüngdangba mapang nung Tena ki jaraji tutet aser ibaji June 6, 2024 nü nüburtedang sayatsü, ta IAA-i sangdong ka ajanga metetdaksü.

Temeshi ainlen jajartemi Mediterranean tzüymkümunung rong/jahaz anena ayuba sülen mapang tatsüka tsüngda item noksatemji yanglu asütsüa akok, ta parnoki bilemer.

Tenla kiji tzüymkümlen nungjagi anogo ka tesadang shi tetsüng agi jajaba sülen atongba tesem ka nung lir.

Yisu Khrista asoba sülen kum 500 shi lir Tenla kiji yanglu

asü südi ta bilemer.

Rome nung Constantine Chuba-i 300s mapang nung Khristan yimsü agizükba sülen nungi temeshi aini aoertemi Yisu Khrista dak sendakba tesemtem kanga sapua semdanga liasü.

Excavation director temi, item noksatemji rong ajanga tzüymkümunung tonga arur temeshi aini aoer Khristantemi salem lemsatepba noksatem lir, ta metetdaksü.

"Ali tua bushisüngdangba tesemji ajanga Byzantine putu tatembanglen aser Islamic putu tenzükba mapang nung Northern Negev nung nisung alitsü tenzükba otsü ashir," ta excavation director temi metetdaksü.

"Temeshi aini aoertemi iba Tenla ki semdang aser jara nung temaitsütem yangluja liasü. Atangji rong ya akhidang Khristan indabg temaitsü liasü. Iba denji külemi ibaji temeshi ainlen jajartemi temeshi lima semdangba mapang parnok senzüba shidakba rong noksa liasü," ta parnokisa metetdaksü.

Tenla kiji akhidang Rome nung lenmang anasa liasü, ta IAA-i metetdaksü.

"Temeshi aini aoertemi Rome nung lenmang nung jaja aser Jerusalem, Bethlehem, Negev Hills nung temeshi tesemtem aser Sinai semdanga liasü," ta excavation director temi metetdaksü.

"Parnok Gaza port nung rong anena ayuba sülen parnok tetsüng agi jaja mezüng anenzükba tesemji iba Tenla ki ya liasü, ta onoki Rahat nung ali tua bushisüngdangba ajanga bushitetogo," ta parnokisa metetdaksü.

Excavation directors team nung züngsemtemji Oren Shmueli, Elena Kogan-Zehavi, Noé David Michael aser Deborah Cvikel nung liasü.

Israel Antiquities Authority nung director, Eli Escusido-i, "Iba ya tesümgangtesü tebusitetba ka lir, koba ajanga kum 1,500 tejaklen temeshi aini aoer Khristantemi temeshi lima semdangba metettsü atema asenok nem lenmang lapoktsür," ta metetdaksü.

America nung missionary ana tasü mang US-i bener aotsü



Davy Lloyd aser Natalie Lloyd

May 28, 2024: Tawa Haiti nung prangpong amer telok kati khasetba America nung missionary ana- Davy Lloyd aser pa kinüngtsü Natalie Lloyd na tasü mang US nung par kidangi bener aotsü, ta Mongolbarnü osang ka ajanga metetdaksü.

Taoba mapang US Tir, Donald Trump-ia missionary Natalie tebu aser Missouri state Rep. Ben Baker den mangyim jashi lemsatepogo,

Pa kibong atema otongdar, Cassidy Anderson-i, "Natalie

asere Davy na tasü mang kidangi bener arutsü atema achaayangogo! Security atema tasü mang bener arutsü mapang, tayimtsü mesüra koba airport atongtsüar memetetdaksütsü," ta metetdaksü.

"Tayimtsü anenba mapang nung iba tesem nungji osangbenertem memelatsü," ta paisa metetdaksü.

Arrshi kum 23, Davy Lloyd aser pa kinüngtsü Natalie Lloyd (21) na ya Haiti nung aliba Missions in Haiti nung toklang tenzükba missionary tem liasü.

Iba mission ya 2000 kum Davy'er tsürabur- David aser Alicia Lloyd nati tenzükba liasü.

Osangbener den jembidang David Lloyd-i, Brihostibarnü par jabaso Davy aser Natalie na Port-au-Prince nung Tenla kidangi nungi meyipa aoba mapang nung prangpong amer telok kati amak, ta metetdaksa liasü.

Ministry indang Facebook page ajanga, "Davy pua kidangi lisü agi alenba sülen azük. Iba sülen auer telok jagi onok indang truck nung parnoki aginüba oset ajak oshiketba mapang nung ano telok ka arua parnok tsüngda raradang telok ka nungi züngsem ka mejungi yiru. Iba rara nung missionary apuani na den ano missionary ka densema khaset. Tasü mang asem nungjagi ana nungbo mi senoktsü," ta metetdaksü.

Osangbener den jembidang David Lloyd-i, par jabaso Davy-i pa lanuwa mapang nungi missionary inyaknüa liasü, ta metetdaksü.

ANO GO ABEN TSÜNGREM DEN

Saisapong Petinu

"Asayaba nung shilem agirtem ajaki peisasa azüoker. . .konang angutsü asoshi parnoki aji inyaker" (I Kor. 9:25).

Lanur kari kodang parnok kumzükba külen parnok azünga aliba mapang sarasadem aser Lai bushiba nung indoker. Kari asayaba nung indoker saka asayaba nung mapang indokbaji kari amajok ta bilemer. Laishiba nungi iba telanzüba lir mali ?

Lai nung jakdaka asayatsü shia meliaka, iba aitsüba kecha nunga zülua mali. Asayaba nungi tatishitsü agia Paul aser Lai zülurtemi tanela len ochiba zulu (Ef. 6: 12; 1 Tim 6: 12; 1 Pet 1:4; Ibri 12: 1,2.; Yakob 1:12).

Saisapongba nung asayar ajaki peisasa azüoka ayur. ibaji Khristantem asoshi rongdak. Idakji tashi angaba lir. Khrista tenzükba mapa nung ibai "kechi" ta masü saka "Koda" aji tongtipang (2 Tim 2: 5,6; . Kor. 3: 10). Asayaba nung mesüra tanga nung asenok külemi inyakba (Team spirit) angazüker. Tejashitsü ka, Khristantem rongnung iba yagi anünger. Meranga inyaktsü yimya asayaba wadang nung angazüker (Ibri 12:1,2; T.M. 20: 24). Asayartemi sempet (medal) angutsü nükjidong ayur. Pamoki tanga kecha marishir. Arogo nung iba tanela samar, ishikati dang tematiba jenjang asoshi meranger.

O, Kibuba, ni shilem agiba ajak nung tazüokba tanela agi meranga inyakdakjangma.

Pakistan nung Khristantem amakba ken o nung nisung 25 puogo

Lahore, May 29, 2024 Quran kaket meraksatsü, ta (Agencies) : Taoba hopta ashia ajisüaka lokti jagi pa Pakistan kübok Punjab province nung Khristantem amakba ken o dak sendakba nung police-i nisung 450 anema ken o benok aser parnok rongnung nisung 25 puogo.

Pakistan nung Islam yimsü temeshi kaket Quran raksatsü, ta Khristantem nem tai tonglokja Honibarnü ((May 25) Islamist Tehreek-e-Labbaik Pakistan (TLP) züngsemtem leniba nung Muslim nung telok tulu kati Sargodha district kübok Mujahid Colony nung Khristantem amak. Iba tatalokba nung Khristan ana den police 10 yirua liasü.

Lokti jagisa Khristantem ki aser kiojen rongdokja liasü.

FIR nung shia aliba agi, nisung 450 dak temai tsüngsem factory kibur aser Khristan, Nazir Masih-i Quran kaket raksatsü, ta tai tonglokja pa dak azük aser par ki, dokan kar aser factory ji rongdokja liasü.

"Parnoki Masih'er kidangi mi senoktsü saka police mapang shidak nung aruba agi Masih den Khristan 10 kumzükba liasü," ta FIR nung shia lir.

Masih'er kibongiba parnoki

Quran kaket meraksatsü, ta ashia ajisüaka lokti jagi pa tepsettsü tebilemba nung azük. FIR nungjisa, "Police-i loktiji senshidaktsütsü atema ajok amshia liasü saka lokti jagi meyiper police dak lung agi aon. Iba tatalokba nung police 10 yiru," ta shia lir.

"Lokti ket nungjagi Khristantem kumzüktsü atema police-i parnok taküm bendanga agütsü. Mapang shidak nung police aruba ajanga Sargodha nung lendong tulu paidoktet. Tangbo yimti nung tensa azüokteta tesünep lir," ta FIR nung shia lir.

Loktii mejungi azüksang, Nazir tang Sargodha nung aliba Combined Military Hospital nung treatment agidar. Police-i, Nazir-i atangji temeshi kaketji raksatsü süra pa anema ken o benoktsü, ta metetdaksüogo.

Tensa azüoktsü atema tang Sargodha kübok Mujahid Colony nung police 2,000 yoka lir.

Yaküm-a Pakistan nung Faisalabad district kübok Jaranwala jila nung Khristan anati Quran kaket shisatsü, ta tai tongloktsüba sülen Muslim nungertemi longkak aيتدang Tenla ki 24 den Khristantem ki 80 dak tema rongdokja liasü.

AO OSHI ANGAZÜKDAK:
TANÜ ANGAZÜKTSÜBA OJANG



Süoshi

(n) tabenba sü tapu ajak (clothes)

* Nisung karibo süoshi nung sen kanga endoker.

Süpet

(v) junga meinyaktet (not done well)

* Inyakertem majungba agi ki süpeta asü.

OLONG PAITEP # 6802

1		2		3		4	5			
				6						7
		8								
9				10		11				
			12						13	
						14				
16										
						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S___i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6801 TELANGZÜBA

TIPIEN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among,
- 12. Miim, 13. Anem.

NAI-A YA METETTER MA



Artist Sree Raj S-i 325.62 square metre nung Queen Elizabeth indang noksa tulu ka yangluteta Guinness World Record ka nguogo. Sree Raj-i mega canvas ka nung coffee powder aser tzü amshia iba noksa yanglu. Manjalumoodu, Kanyakumari district, Tamil Nadu nung aliba Narayana Guru College of Engineering ajanga agütsüba tawa nung iba artwork yua lir.

Sree Raj-i tang agi tanaben Guinness World Record nguogo. Tesüiba nung pai 357,000 matchsticks amshia Charlie Chaplin indang mosaic-style portrait ka yanglua liasü.

Arunachal Assembly election atema June 2 nü votes azüngtsü



Itanagar, May 29, 2024

(Agencies): June 2 anepdang 6:00 ako nungi Arunachal Pradesh Assembly elections votes azüngtsü ta ketdangsür kati ashi.

Arunachal Pradesh nung April 19 nü Assembly aser Lok Sabha elections külemi agia liasü.

"June 2 Assembly election aser June 4 Lok Sabha election vote azüngdang ketdangsür 2000 tema mapa lezmüksütsü" ta ketdangsüri ashi.

June 2 anepdang 6:00 ako nungi assembly elections aser June 4 anepdang 4:00 ako nungi Lok Sabha election indang votes azüngtsü ta Chief Electoral

Officer Pawan Kumar Sain-i ashi.

"Tang atema onoki district ajak nung constituency ajak külemi votes azüngtsü lemtetogo aser anüngdang tashi nung results metetdaksütsü merangtsü" ta Sain-i ashi.

Counting updates osang agütsütsü atema counting centre ajak nung media centres lapoktsü.

"June 2 nü centres 24 nung assembly menden 60 nungi 50 atema votes azüngtsü. Lok Sabha election atema centres 25 nung votes azüngtsü" ta Joint Chief Electoral Officer Liken Koyu-ia ashi.

Assembly menden 60 nungi

10 tashi BJP den tetokteper shinga mali takok nguogo.

CEO-isa DEO political party balala counting agents ajak cell phones medeni counting centre telungi idaktsütsü tetuyuba agütsüogo.

Arunachal assembly election nung candidate ajak agi 133 lir aser Lok Sabha menden ana atema candidate 14 lir.

Arunachal West Parliamentary nung Union Earth Sciences Minister Kiren Rijiju aser state Congress president Nabam Tuki na dena candidate 8 toktep.

Arunachal East Lok Sabha menden nung BJP MP Tapir Gao aser state Congress vice-president Bosiram Siram na dena candidate 6 lir.

2019 elections nung BJP-i Lok Sabha menden anaprong nung takok ngua liasü aser assembly election nung BJP-i menden 41 nung takok angu.

Taoba assembly election nung JD (U)-i menden 7, NPP-i 5, Congress-i 4, PPA-i 1 aser Independent candidate 2-i takok angu.

Assam nung gas agency kati gas melena tzü enoker ayok

Guwahati, May 29, 2024

(Agencies): Assam kübok Jamunamukh nung local gas agency kati gas cylinders nung tzü enoker ayokba mapa putetogo.

Customers-i gas cylinders nungi tzü aenba anguba sülen parnoki gas agency dak temulung malem aküm.

Jamunamukh nung tesayur

kati gas cylinder ka ali saka LPG fuel melena tzü enokaer aliba angu. Iba atema customer jagi Kathiatli Fuel Gas Agency nem osang sangoktsü.

"Ni tawa tu gas agency nungi LPG cylinder ka ali aser anogo ana dang amshir temadok. Iba jagi cylinder jungjunga repringdang gas melena tzü enoker aliba putet" ta tesayuri ashi.

"Ni gas agency nem cylinder meyipa agütsüadang ni amshiba gas atema sen menoktsüla ta ashi. Iba ya ni dang masü saka iba temeket nung alir aikati ajuruogo" ta paisa ashi.

Iba tatalokba angashia nübortemi jashiteper aser parnoki administration dang jungjunga bushisüngdang asütsü akhanger.

Meghalaya-i Village Defence Parties tashi itdaksütsü

Guwahati, May 29, 2024

(Agencies): Meghalaya sorkari Village Defence Parties (VDPs) teimba akümtsü lemtet agiogo.

Mongulbarnü Social Welfare Minister Paul Lyngdoh-i anir senden ka amendang drugs anema tuluba raratsü lemtet agiogo.

Iba senden nung home, police, social welfare department tem

den drugs anema noktakba NGOs aika aden.

Shillong yimti dena drugs amshiba tesemtem nung VDPs tashitaitba kümdaksütsü atema Minister Lyngdoh-i ashi.

"Meghalaya nung drugs & narcotics samatsütsü atema civil society shilem agütsü lenmang sadema lapoktsüla" ta pai ashi.

Minister Lyngdoh-isa tawa

dorbar shnongs den sensaksemba aser parnoki pei pei telongtet nung drug khuret anema inyaksü mulungba osang lemsatetep.

Dorbar shnongs dak tashi peria mali anungji sorkari VDPs ajanga community policing tajungba inyaksü aser parnok nem drug anema raratsü atema training shitak agütsütsü ta Minister-isa metetdaksü.



Mizoram kübok Aizawl district nung Bodbarnü tasü mang 4 nguteta tasür ajak agi nisung 29 kümogo. Cyclone Remal ajanga tzünglu kanga aruba aser anentsüh aludang tesem balala nung nisung 7 tashi samar bushitepdar. Lung atsükdak ka chirepba lendong nung tasü mang 15 ngutetogo aser Hlimen nung tasü mang 5 nguogo ta Aizawl Superintendent of Police Rahool Alwal-i ashi.

Anüölen linüktem indang missile-i Russia dak kongshira mepetmesü tulu adoktsü: Putin

Moscow, Monupii/May 29 (Agencies): Russia tir Vladimir Putin-i Mongolbarnü, alüölen aliba linüktemi Russia nung tesem balala amaktsü atema Ukraine nem parnok indang missile amshidaktsüra mepetmesü tulu adoktsü, ta tekümdangtsü metetdaktsüogo.

France tir Emmanuel Macron-i, Ukraine dak khaloktsüba missile tem amenoka aliba Russia nunger indang military base tem amaktsü atema Kyiv nem temelaba agütsüsüla, ta ashiba sülen tang Putin-i iba tekümdangtsü metetdaktsüogo.

Temetetsü kaji Ukraine tir Volodymyr Zelensky-i anüölen aliba linüktem dang parnok nem prangbong injang aser hadir balala talila agütsüsü mepeshia arudar.

NATO züngsem kar aser iba alliance tekolakba Jens

Stoltenberg-i dena, Ukraine nem parnok indang hadir balala amshia Russia amaktsü atema temelaba agütsüsü ayongzükba sülen Putin-i iba olen lemsatepogo.

"Iba amala inyakyim ajanga mepetmesü tulu adokdaksütsü," ta Putin-i Uzbekistan semdangba mapang ashi.

"Europe nung aser talisa linük tilatemi parnok kechi den asayar aji jangja alitsü nüngdaker," ta pai ashiba den, Europe nung linük aika alinük tilala dang aser nütsünyongtsük aika lir, ta ashi.

"Russia amaktsü atema mejembi tsüngda parnoki iba ya temulungdang ayutsüla; iba ya süoki ia agütsüba ken o ka lir," ta pai ashi. Paisa, Ukraine nunger sepaitemi Russia amakyonga, khuret ya parnok nem prangbong injang aser hadir balala agütsüba anüölen aliba

linktemi abentsü, ta ashi.

Putin-i ashiba agi, anüölen aliba linüktem nungi military instructors tem Ukraine tonga aruogo aser parnok mercenaries ama inyaksangshidar ta amanger, aser item instructors tem ya officially yoktsü atema jenjang agira iba ajanga Europe aser alima ajunga nung mepetmesü adoktsü.

Ukraine nunger commander temi Hombarnü ashiba agi, par linüki military instructors tem yoktsü atema France den sensaksemdar.

Iba dak sendakba nung Putin-i, Ukriane nunger shir lidir liaka ibaji masadangi onoki kechi shitak ta bilemer aji inyaktü, ta ashi.

EU linüktemi 2022 küm amenokba mission ka kübok Ukraine nunger sepai 50,000 nem linük nungi pilar training agütsüogo.

Israel-i UNSC pangzüng nung manidaki Rafah amaker

Gaza City, Monupii/May 29 (Agencies): Gaza south tsütsü Rafah nung nisung tepsetba anentsü atema UN Security Council nung pangzüng ka renema liaka Israel-i maneni iba yimti amaker.

Israel indang tanks tem Rafah yimti tiyongi aitogo ta tenük kuli alirtem aser Palestine security osang ajanga shir ghonda ishika lir Bodhbarnep iba yimti nung tayimtsü amshia amakba osang lir.

"Nüburtem ki telung nung lir, kechiaser shiba arakzüdir Israel indang drones agi akhar," ta iba yimti nung alir kati ashi.

Israel-i tayimtsü amshia yimti anüölen tsütsü Badr camp aser Zourob tesem densema yimti tesem balala nung tenük yoker amaker, ta Palestinian news agency Shehab-i ashi.

Rafah tesem ajunga nung internet aser telecommunications services tem ajunga samaba osang lir.

"Mitkar temi Philadelphia Corridor amokbanga lir aser tang parnok tanüngba corridor telungi aita Rafah yimti anüölen tsütsü aor."

Tayimtsü amshia amakba mapang Israel sepaitemi nüburtem tesem ka nungi kati meinshir, ta osangbener kati ashi.

Taoba mapang Israel mitkari Gaza north aser central tsütsü amakdang Rafah ya safe zone sangdonga liasü. Aser iba mapang nisung million 2.3 shi iba yimti yagi aita liasü.

Tang Israel-i amak tenzüker nisung million ka jungnüa Rafah yutsür ainshio go ta ashir. Israel tembar linük temia iba yimti mamaktsü tekum dangtsü shia arur, kechiaser iba yimti nung civilian aika takum samatsü aser

humanitarian crisis ajurutsü ta ashir.

US Tir Joe Biden-ia Israel dang Rafah nung military operation tulu magitsü ajungshir. Ajisüaka Israel-i 'red lines' ano majang ta par administration ajanga Mongulbarnü shia liasü.

"Parnok Rafah telungi aiba onoki mangu," ta National Security Council spokesman John Kirby-i ashi.

Mongulbarnü Israel-i Rafah yimti anüölen displacement camp ka nung amakdang nisung 21 tepset, ta Gaza nung civil defence ketdangtsür kati ashi.

Mongulbarnü parnoki designated humanitarian tesem ka nung amak ta tai tongloktsüba Israel army-i magizük.

"Onoki Al-Mawasi nung humanitarian area mamak," ta army temi Rafah nung aliba nüburtem jenoktsü atema lazükja aliba tesem ka athishia sangdong ka nung ashi.

Hopta tatemlen iba mesük amakba nung nisung 45 tepseta linük balala mepelai akum aser Algeria-i Mongulbar nikonkdang UN Security Council senden jazüka liasü.

North African linüki iba senden nung Israel-i Rafah amakba anentsü aser tangsa ceasefire alitsü draft resolution ka benoka liasü.

Taoba hopta International Court of Justice ajanga Israel dang iba yimti anakba tangsa anentsü totuyuba agütsüba amshia iba pangzüng ya benoka liasü.

Züngsem 15 aliba UN Security Council senden amenba sülen, Rafah nung nisung tepsetba anendaktsüsü nükjidong nung iba senden ya

ayongzük, ta Algeria indang UN ambassador Amar Bendjama-i ashi. Algeria ya council nung 2024-25 atema züngsem lir.

October 7 nü nungi tenzüka Israel-i Gaza amakdang Palestine nung nisung 36,171 tepsetogo aser 81,420 yiruja lir, ta Gaza Health Ministry ajanga ashir.

Tesüiba ghonda 24 tsüngta nisung 75 tepset aser 284 yirutsü ta ministry ajangasa ashi.

biological warfare response team yokogo aser kasa mapang nung nüburtem dang iba amala osettem nungi pila alitsü aser ngura ketdangtsürtem nem metetdaktsüsü tetuyuba agüja liasü.

Balloon tem meyok tsüngda South Korea nunger ketdangtsürtemi iba indang osang angazüker liasü. North indang vice minister of defence Kim Kang Il-i, Deobarnü sangdong ka ajanga North-i jana yokba atema telangzüba agüja South-i tamagitsü paper aser janatem aika yoktsü, ta shir liasü.

North Korea nungi jena arurtemi anir South Korea nunger activist temi balloon nung Pyongyang anema osangtem zülur aliba leaflets aser K-pop music videos inoker aliba USB memory tem North-i mapangshia yoka aruogo.

Iba inyakyim ajanga Pyongyang kanga mepelar, kechiyong bendanglen nungi osang balala aruba ajanga nüburtem rongmesotsü akok,

PELABA LEMSATEPER



Asür Maputala Ayoklar (Akhoya)
29.12.1930 - 18.5.2024

Onoki teti meima anebalua aliba Ojala Dimapur nung akümüli wadang tembanger pei taso limai aodang temeimertem, Arogotem, lokdi tentet, kija aser kibongtemi nübu, sarasadem, rongsen aser nüngdakattem lenmang balala nungi yariba asoshi kanga pelar. Tsüngdong arua melemsaba atema sasar. Nenok temeim mapa tajung Tsüngremi talubusa moajangma ta onok sarasadem.

~ Chirnurtem, Semchirtem, Anükapang, aser Kinungertem

OFFICE OF THE JENANG KOSASANGER POJO ASEM MENDEN UNGMA VILLAGE

ALIMA DANGI SANGDONGER

Mr. Onentiba Jamir Tatar, S/o Lt. Takowati Jamir, pai Ungma Yimlang Jenang Kosasanger Pojo Asem Menden den maparen aika nung anema inyak nung pai jembiba o temji angatepteptsü asoshi Pojo asem menden Ong Salangi mapang balala nung asemben tashi jaok, saka yimsüsür ka memesük pai kodanga ken oji angateteptsü maru. Ao lima nung nübur madak yimsüsür katibo pei jembiba oji temeden kuli aka nung dang jembiba sobalibar. Ungma yimlang nung pojo asem pusu menden ji nübur saru aser tashi madak tasüngtet Aor sobaliba dak ajemdaker yimsü asür, saka Mr. Onentiba Jamir tatar, pabo yimsüsür ka memesük par jabaso kati lar (kidong) den raksaba kuli-a tejangja lir. Anungji pa ama sobaliba memetetba aser taktü maketba yimsüsür den Ungma Yimlang Jenang Kosasanger Pojo asem mendeni tanü nungi paji yimsüsür asütsü medemsü ta sangdonger. Anungji pai Pojo Asem menden den ken o mangatetep tashi pa den amalitep malitsü.

[Signature] 29/05/2024
Kazütemjen Longkumer Tatar (Aola)
Ungma Yimlang Jenang Kosasanger

Sd/-
Secretary
Pojo Asem Menden

North Korea-i jana bener balloon tem South leni yok

Seoul, Monupii/May 29 (Agencies): North Korea-i jana aser scü bener balloon noklang aika arrtsü adena South-i yokogo.

South Korea military-i Bodhbarnep lemsatepba noksa nung ali nung tsüker aliba balloon anasa jana prokshir aliba den yangku ka nungbo scü ta zülur aliba nguogo. North-i ashiba agi, toilet paper aser scü inoker aliba julitem ya South Korea-i balloon amshia parnok anema jenjang agiba atema telangzüba agütsüba lir.

"Onoki North dang mimchir-i minyaktsüba iba inyakyim aser jenjang maketba inyakyim ya tangsa tang anentsü metetdaktsür. North inyakyim ya international temzüng ozüng anema lir aser iba ya ozü nüburtem atema amokmeren ka lir," ta Seoul indang Joint Chiefs of Staff-i ashi.

Balloon nung inoker yokba osettem asadangtsü aser bendentsü atema military indang explosives ordnance unit aser chemical &

asera iba ajanga Kim Jong Un yimsüsüba amokmerentsü akok ta tsüba bilemer.

Taoba South Korea sorkari iba amala inyakyim benoka inyakba nokdangtsü atema jenjang agiogo. Parnoki ashiba agi, iba ajanga yimjung asoshi inyaktepba mapang kecha teyari magütsür aser aartsü anasa aliba nüburtem lendong nung toktsür.

2021 küm North-i balloon tem yokba nokdangtsü atema inyakyim ka benok, ajisüaka SC-i iba ajanga freedom of speech dak kongshir ta shia iba inyakyim ya agintsü.

Iba hopta Pyongyang-i satellite ka yokba tamakok anguba sülen linük ana tsüngda ano tensa mejungi kümogo.

North Korea-i Hombarnü tanabuba spy satellite yoktsü meranga liasü, ajisüaka anüngtom nung pokatok.

North-i satellite yoktsü merangba anemba temaitsü satellite meyok tsüngda ghonda ishika jelia South-i fighter jets drill ka ayongzuka agia liasü.

Barcelona aser Hansi Flick na officially tenangzüktepba yangluogo

Monupii/May 29, 2024 (Agencies): Taoba hopta Xavi Hernandez mapa nungi anentsüba sülen Barcelona-i taoba mapang Bayern Munich aser Germany coach Hansi Flick den 2026 küm June ita tashi atema tenangzüktepba ka yangluogo.

"2026 küm June 30 tashi Barcelona men's first team football coach mapa abentsü atema FC Barcelona aser Hansi Flick na mulungtepogo.

"Coach tasenbi Club indang office nung contract nung sign süogo aser tenangzüktepba yangluba mapang FC Barcelona tir Joan Laporta-a densema liasü," ta club sangdong ka ajanga metetdaksü.

Flick lenisüba nung 2020 küm Bayern puri otsüsüsüsa takok marok trok tashi kokteta liasü, ajisüaka asaya ishika nung tamakok anguba sülen pa

ya 2023 küm September ita German national team-i mapa nungi anentsü. Pa ya national team coach mapa nungi anentsüba mezüngbuba coach aküm.

Ajisüaka Barcelona puri coach tajung ka shimogo, ta amanger.

"Coach mapa atema Hansi Flick shimba sülen FC Barcelona puri, kanga nongshia asayaba team ka anitetba nisung ka shimogo, shibai club aser international jenjang nung takok tajung ngua football asaya nung takoktsü aliba tashibo ajak amai kokteter lir, ta club sangdong ajanga metetdaksü.

Arishi küm 59 asayar yagi iba season Barcelona pur asaya kar presidential box nungi reprangogo, aser Xavi-i January ita season tembangba sülen pai club toktsütsü ta ashiba sülen pa iba mapa

atema club den sendaktepa liasü.

Iba sülen Barcelona aser Xavi nati April ita taruba season-a pai coach mapa maneni abentsü mulungtepa liasü saka Laporta-i pa mulung melenshia taoba hopta Xavi mapa nungi anentsüogo.

"Coach mapa abentsü atema temela masütsü. Parnok kanga kangshitsü aser atasa inyaksü nungdaksü, kechiyong iba ya mapa kanga tasak lir," ta Xavi-i taoba hopta pa melentsüpurtem nem tekümdangtsü metetdaksü.

"Parnok club nung sendaka aliba maliba kecha tongtibang masü, takok anguba ajanga dang parnok kümzüktettsü," ta Xavi-isa shisem.

Madrid puri la Liga akokba anguba dang masü Barcelona pur Champions League nunga quarter-finals nung Paris Saint-Germain-i tsükdaksüogo.

Bellingham nem La Liga Player of the Year naroküm agütsü



Monupii/May 29, 2024 (Agencies): Real Madrid aser England nunger midfielder Jude Bellingham nem La Liga's Player of the Season naroküm agütsüogo. Pa Spain nung mezüngbuba asayaba küm iba naroküm nguogo.

Arishi küm 20 tain Bellingham-i league asaya nung goal 19 idakja Real puri point 10 tejakdang sür La Liga akokba nung teyari agüja liasü.

Carlo Ancelotti-i aniba team Champions League final tongogo aser iba asayamung nunga Stourbridge nung asoba asayar yagi iba goal pezü idaktsür lir. Real pur Honibarnü Wembley nung Borussia Dortmund den Champions League final asayatsü.

Bellingham-i iba naroküm atema team-mate Vinicius Jr, Antoine Griezmann (Atletico Madrid), Artem Dovbyk (Girona) aser Robert Lewandowski (Barcelona) nunger ajateta liasü. La Liga's Player of the Season atema fan,

club captain aser mongintem panel kati vote agütsür.

Pa Real-i euro million 103 yong maru tsünga Dortmund nungi asayaba mapang 2022-23 Bundesliga Player of the Season naroküm ngua liasü.

"Iba naroküm ya ni ozi team-mates, coaching staff aser talisa alima nung club tajungtiba fan tem nem bendanga agütsür," ta Bellingham-i ashi, shiba Honibarnü final atema renemshiba ajanga Mongolbarnü iba sentong nung medenteti liasü.

Kasa mapang nung Bellingham England team nungia 29 ben asayar lir aser pai linük atema goal asem idaktsür lir.

Germany nung Euro asayaba mapang Gareth Southgate-i aniba team nung pai tongtibang shilem agütsü imlar. Iba asayamung ya June 14 nü tenzüksü.

Euro nung England team mezüngbuba asaya June 16 nü Gelsenkirchen nung Serbia den asayatsü.

Singapore Open: Sindhu 2buba round-i iogo; Sen tsükogo



Monupii/May 29, 2024 (Agencies): Bodhbarnü Singapore Open tetsür kija asaya nung P V Sindhu-i takok ngua la tanabuba round-i iogo, ajisüaka Lakshya Sen bo world number one asayar Viktor Axelsen-i tsükdaksüogo.

Sindhu-i küm ana tejakdang Singapore nung tatembangsa BWF title ka bener lir aser taoba hopta la Thailand Open nung tanabuba jenjang nung tembangba sülen tang iba asayamung nung shilem agidar.

Bodhbarnü Denmark tsür world no. 21 Line Hojmark Kjærskeldt den asayaba mapang Sindhu-i asaya 21-12 22-20 agi minute 44 nung asaya koka liasü. La taruba asaya Spain tsür Rio Olympic champion Carolina Marin den asayatsü.

World No. 3 Marin aser Sindhu na tang tashi nung 16 ben asaya lir aser Marin-i 11benbo koker lir. Tena tatemsa Denmark Open nung asaya liasü aser iba mapang

mangatetep adoka asatepba sülen tenaprongla nem yellow card agüja liasü.

World no. 14 Lakshya, shiba taküm mezüngbuba Olympic nung asayatsü lir, pai kanga meranga asayaogo ajisüaka tatem nung 13-21 21-16 13-21 agi Axelsen-i pa koka liasü, shibai taoba hopta Thailand Open kokogo.

Tebur kija asaya nungsa India nunger asayar Kidambi Srikanth yiruba ajanga asaya tom nung anenadok. Japan nunger fifth seed asayar Kodai Naraoka den asayaba mapang 14-21 3-11 ta pa tesülen aliba mapang pa yiruba ajanga masayatetsüsa aküm.

Kasa asayamung tarep temeyoktep asaya nung B Sumeeth Reddy aser N Sikki Reddy na 18-21 19-21 agi Malaysia nunger tarep Goh Soon Huat aser Lai Shevon Jemie nati tsükdaksüogo.

Tarep temeyoktep asaya nungsa India nunger tarep Venkat Gaurav Prasad aser Juhi

Dewangan natia 8-21 8-21 agi Mads Vestergaard aser Christine Busch na mekoki liasü.

Sindhu aser Line na asaya kasasa dang tenzüker aser mapang ka nungbo tena point 8-8 ta kasa liasü saka iba sülen India tsür la ya point ana agi tejakdang aküm.

Sindhu-i point ishika kanga kara anguba sülen la 16-11 agi tejakdang aküm aser iba sülñ Line nem point ka dang ngudaksü aser lai asaya koka liasü.

Tanabuba set nung Sindhu-i maneni kanga junga asaya aser la 5-1 agi tejakdang liasü aser break tashi nung 11-7 ta lasa tejakdang liasü.

Ajisüaka Line-i tanem tanemai kanga junga asayateta tena point 14-14 ta kasasa aküm aser decider asayatsü atema point pezü dang nungdaka liasü, ajisüaka Sindhu-i asendenshir tajungba asayateta point trok atonga angu aser asaya koka liasü.

Bournemouth-i Turkey nunger asayar Unal alizükogo

Monupii/May 29, 2024 (Agencies): Bournemouth-i Turkey forward Enes Unal pound million 13 yong Getafe nungi alizükogo. Pa den permanent deal ka yangluogo.

Arishi küm 27 tain Unal ya January transfer window nung loan nung Bournemouth nung arua aden, aser club-i otsüsüsüsa Premier League nung taküm mezüngbuba point 48 anguba nung teyari agüja liasü.

Pai club den küm pezü atema tenangzüktepba ka yangluogo.

"Ni January ita nungi idaki iba project nung shilem agütsü tejangraba liasü aser onok tarutsü nung maneni renlokyonga aotsü tashi lir ta bilemer," ta Unal-i ashi. Pa indang career nung pa Manchester City nunga küm ana liasü saka league nung club tenung nungi khen danga masaya.

Bournemouth boss Andoni Iraola-i April ita Bournemouth-i Unal teti atema alizüksü ta shir liasü.

Pa loan nung arua Bournemouth nungi asayaba mapang goal ana idaktsüogo. Pa asaya asem nung tetenzük nungi asaya aser asaya 14 nung substitute ama asaya liasü.

Pa Bournemouth nungi mezüngbuba asaya March 9 nü Sheffield United den goal 2-2 ta draw nung tembangba asaya nung nung shilem agi, aser April 28 nü kidang Brighton goal 3-0 agi akokba asaya nung mezüngbuba goal idakja liasü.

Kasa mapang nung Unal Turkey team nungi 32 ben asayar lir aser Euro 2024 atema-a provisional squad nung züngoksema lir.

Euro nung Turkey pur Portugal, Czech Republic aser Georgia den kasa telok nung ata lir.

BILEMDANGANG

"Nükjidong makartem den medemra pei nükjidong sama aotsü."